

DISPUTATIO
DE
HÆMORRHAGIA
NARIUM.

*Solenniter in Universitate Argentinenſium
propoſita*

à

MELCHIORE SEBIZIO,
MEDICINAE DOCTORE AC PRO-
FESSORE ORDINARIO, COMITE
Palatino Cæſareo, & Reipubl.
Archiatro:

Reſpondente

JOHANNE DANIELE WILVISHEIMIO,
ARGENTORATENSIS.


Die Mens. Decembr.



ARGENTORATI,

Typis EBERHARDI WELPERI.

M. DC. XLIX.



V I R O

CLARISSIMO ET EXPERIENTISSIMO,

DN. JOHANNI JACOBO

SIGLERO, Medicinæ Doctori eximio,
Practico apud Argentoratenses felicissimo:

NEC NON

V I R O

REVERENDA DIGNITATE ORNATISSIMO,

DN. M. PHILIPPO FIEGLE-

RO, Summi Templi Argentoratensium
Diacono fidelissimo, meritissimo:

*Dominis Patronis & Promotoribus suis debita
animi submissione perpetuò colendis,*

Disputationem hanc de Hæmorrhagia narium,
in sui studiorumque suorum commen-
dationem.

Offert & consecrat

JOH: DANIEL WILVISHEIM,
Respondens.

THESIS - I.



*U*nemadmodum aliorum sensuum organa suos patiuntur affectus, morbos scilicet ac symptomata, ita & olfactus sensorium, ipse nimirum Nasus, non paucis morbis & symptomatibus divexatur.

II. Inter symptomata autem illius haud postremum locum *HAEMORRHAGIA* obtinet. Frequenter enim in praxi nobis occurrit, & adeo nonnunquam enormis est & impetuenta, ut egrè admodum fisti queat, & propterea laborantem non raro ob spirituum dissipationem, caloris diminutionem, ac sanguinis, qui commune est totius corporis alimentum, effluxum, in vita discrimen adducat.

III. Schenckius lib. 1. observat. 359. aliquot prodigiosæ narium hæmorrhagiæ historias ex Matthæo de Gradibus, Bravolo, Marcello Donato, & Amato Lusitano recenset, quibus planum facit, sanguinis libras 18 20. & 40. intra spatium unius, quinque, & sex dierum è naribus erupisse.

IV. Itaque digna nobis visa est hæmorrhagia, cujus & θεωρία, & πραξις explicetur. Ac in illa quidem nomenclaturæ, significata, definitio, genus, pars affecta, differentiæ, causæ, signa, tum διαγνωσικά, tum προγνωσικά declarentur. In hac verò curandi ratio proponatur.

V. *SIGNIFICATA* hæmorrhagiæ quod attinet, habet vocabulum istud numero tria. Primum enim omne sanguinis profluvium denotat, sive confertim & copiosè, sive parcè ex venis, aut arteriis, interiorum, vel exteriorum partium fiat. Fluere autem spontè, & quidem frequentius, quàm aliunde, solet, ex

ore, naribus, thorace, pulmone, ventriculo, hepate, liene intesti-
vis, venis hamorrhoidalibus, utero, vasisque urinaris.

VI. Deinde id solummodo profluvium sonat, quod fit af-
fatim, ἀπὸ τῆ παύειναι, ἢ παύειν, quod est apud Hippocratem
αἱμορρῶδες ὀσμῶν, cum impetu prodire. Παύεισα enim, inquit Gale-
nus in explanatione vocum Hippocraticarum id indigitat, quod
confertim impetum facit: estque αἱμορρῶδης dictio ab ea com-
posita.

VII. Tertiò pro illo sanguinis profluvio usurpatur, quod
è naribus contingere solet. Est igitur prima significatio genera-
lissima: specialior secunda: specialissima tertia.

VIII. Hippocrates hamorrhagiae vocabulum aliquando
ponit simpliciter, sine additione partis, unde sanguis emanat: Et
tùm eruptionem sanguinis è naribus inaudit. Accommodare au-
tem videtur αἱμορρῶδης nomen narium profluvio καὶ ἐξ ἄλλων,
I. quia utrique sexui, omnibusque aetatibus, in & extra morbos,
accidere solet. II. quia cetera sanguinis profluvia peculiaribus
nomenclaturis sunt insignita, quæ vel à termino, unde prodeunt,
vel à loco, per quem feruntur, vel à tempore, quo fiunt, petun-
tur. Vnde κατὰ μῆναια, γυναικῆα, λόχεια, δυσεντερία, αἱματώδεις,
αἱμορρῶδεις, & ῥήσις αἱματώδεις &c. appellantur. Interdum verò
nares addit. Quando verò de sanguinis profusione ex aliis
partibus verba facit, illarum ut plurimum meminit, & unde
sanguis prodeat, exponit. Sic enim Galenus comm. 1. in
libr. 1. epid. §. 9. & comm. 3. in l. 6. epid. §. 25. monet.

IX. Neque hoc aliquid novi est, cùm sciamus, etiam alia
vocabula plurima, quæ generalia sunt, specialiter usurpari: quem-
admodum pleuritidis, peripneumonia, hepatitidis, splenitidis, ne-
phritidis, arthritidis &c. exemplo probari potest. Significant enim
voces istæ quemlibet pleura, pulmonum, hepatis, splenis, articulo-
rum renumque affectum: usus tamen, quem penes & jus est, &
lex, & norma loquendi, ut Horatii verbis utamur, obtinuit, ut
in specie solum dictarum partium inflammationes exprimant.

Quam-

Quamvis haud nos lateat, nephritidem communiter etiam calculum renum, & arthritidem articularum dolorem sonare.

X. Hippocrates affectum nostrum in Coacis, prognosticis & prorheticis etiam αἷμα ὅσον ἐκ πινέων, ῥῆξιν αἷμα ὅσον διὰ πινέων, ῥύσιν ἐκ μυκλήρων, & κατὰ τὰς πῖνας, & αἰμορροῖην dialecto jonica appellat.

XI. Est autem hemorrhagia, ut ad DEFINITIONEM accedamus, sanguinis profluvium confertim è naribus, criticè, vel symptomaticè factum. Vnde Author. defin. medicin. scribit, αἰμορροαγίαν εἶναι λάβρον αἷμα ὅσον ἐκχυσιν, esse abundantem, impetuosam, rapidamque sanguinis effusionem: hocque nomine ab hamorrhoidè differre, quæ est κατὰ περιτῆδην, & κατ' ὀλίγον αἷμα ὅσον Φορὰ, sanguinis delatio per dissultationem ac paulatim facta: quanquam praxis doceat, per venas hamorrhoidales nunquam etiam magnam sanguinis copiam emanare.

XII. Ex hac definitione constat, hamorrhagiam symptoma esse in genere immodicè excretorum. Sequitur autem vel symptoma aliud, nempe retentricis facultatis imbecillitatem, aut expultricis laceßitæ indignationem: vel solutam in vasis continuitatem: vel ipsemet sanguis sua quantitate, aut qualitate in causa est, uti mox dicemus.

XIII. Hic autem queri solet, qualisnam sit excretio ista? Et plerique omnes respondent, excretionem esse toto genere præter naturam. Galenus enim lib. de vivor. anat. c. i. l. de cur. rat. per S. M. c. 5. Comment. 5. aphor. 64. & l. 6. de loc. affect. c. 4. scribit, sanguinem esse vitæ thesaurum, naturæ dilectum filium, commune corporis nostri pabulum, fomentum nativi caloris, succumque nobis valdè amicum, imò eorum omnium, quæ in corpore nostro sunt, maximè nobis familiarem. Ideoque illum sibi reservare quàm maximè studet. Quodsi erumpat, non immeritò evacuationem toto genere præter naturam esse credendum: quoniam id excernitur, quod est naturalissimum, quodque in corpore manere debet.

XIV. Nos distinctè respondendum esse arbitramur. Symptomaticum enim sanguinis fluxum excretionem præter naturam esse putamus, & ratione temporis, si fiat statim in principio acutorum morborum, & ratione materiæ effluentis: criticum verò nequaquam talem excretionem statuimus: quoniam fieri solet ex propria naturæ intentione, conantis se liberare ab eo onere, quo veluti gravi sarcina premebatur. At quod studio & opera Naturæ fit, quomodo toto genere præter naturam dici potest?

XV. Sive ergò sanguinis abundantia in sanis, sive superfluus ac vitiosus sanguis in agris Naturæ instinctu excernatur, talis sanè excretio naturalis & critica, neutiquam toto genere præter naturam vocari meretur.

XVI. At si symptomaticè in principio statim morborum, nullis prægressis signis concoctionis, nullo cum levamine decumbentis, neq; in die aliquo decretorio sanguis evacuetur, haud immerito vacuatio toto genere præter naturam censetur: præsertim cum non sanguis, sed humor alius, aegritudini occasionem & ansam præbuit. Excernitur enim, quod causa morbi non est, quodque manere in corpore debet.

XVII. Obijcies, sanguinem naturalissimum quid esse. Quis ergo illius excretio non possit toto genere præter naturam nominari? Respondemus, naturalissimum quid esse, & Naturæ familiarissimum, si neque in quantitate, neque in qualitate peccet. At si nimius sit in quantitate, aut in qualitate vitiosus, tantum abesse, ut Naturæ familiarissimus sit, ut etiam eidem planè adversetur. Nimius enim venarum rapturam, suffocationem nativi caloris, inflammationes viscerum, apoplexiam, aliosque periculosos ac lethales affectus minatur: vitiosus autem & putridus putridas febres, ac cum primis πυρόχρως, ulcera, scabiem, mala alia generare solet: quemadmodum Galenus multis in locis suorum monumentorum docet.

XVIII. PARS AFFECTA nares sunt, quatenus per eas fluxus sit sanguineus. Afficiuntur autem nares vel per essentiam,

sentiam, quando vasa illarum aperiuntur, rumpuntur, vulnerantur, eroduntur, contunduntur, aut ita rarefiunt, ut tenuior sanguis per illas quasi transcolari, & veluti sudor transmitti possit. Vel per consensum, cum venæ & arteriæ partium aliarum, ac potissimum cerebri ejusque meningum, in nares se exonerant.

XIX. DIFFERENTIAE petuntur à forma, loco, vasis, causis, modo generationis, quantitate, duratione &c.

XX. Ratione formæ alia hæmorrhagia est critica, quando natura die critico, prægressis signis $\pi\epsilon\tau\alpha\alpha\pi\upsilon\varsigma$, in febribus acutis & ardentibus, phrenitide, cephalalgia sanguinea, aut à vaporibus acribus & fervidis excitata, angina, interiorum viscerum inflammationibus, cum $\epsilon\upsilon\Phi\omicron\pi\iota\alpha$ agrotantis sanguinem per nares excernit: sicut alias illum per venas uterinas in mulieribus, & per hæmorrhoidas in viris eycere solet. Alia symptomatica, quæ vi morbi, seu causæ morbificæ, Naturam copia gravantis, aut qualitate morbosa stimulantis & irritantis, in principio statim egritudinis, nulla cum decumbentis allevatione, sed potius cum dispendio virium accidit.

XXI. Ratione loci, unde prodit, alia immediate provenit à naribus, alia à cerebri & meningum vasis. Item, vel ex una, vel ex ambabus naribus contingit.

XXII. Ratione vasorum, alia fit ex arteriis, alia ex venis dictarum partium. Ex illis sanguis spirituosus & cardiacus: ex his hepaticus & alimentarius emanat.

XXIII. Ratione causarum, alia profecta est à causis internis, alia ab externis, quas jamjam enumerabimus.

XXIV. Ratione modi generationis, alia insequitur symptoma aliquod, v. g. infirmitatem Naturæ & Retentricis, non potentis orificia vasorum claudere, & sanguinem in illis detinere: alia morbo succedit, v. g. alicui continui solutionis speciei.

XXV. Ratione quantitatis effluentis sanguinis vel enormis est valdeque impetuenta, quæ vires magnoperè deiecit: vel minus talis & remissior. Quodsi solum guttatim stillatimque sanguis

sanguis effluat, non hemorrhagia, sed ἀποσαΐσις, & ἀπαισάσις. ἔστι ἐκ πύων, ab Hippocrate in Coaco, Stilla sanguinis ex narib. ab interpretibus nuncupatur.

XXVI. Ratione durationis alia durat continuè & diu, v. g. dies 2. 3. & plures: alia brevi cessat: sed per intervalla re-vertitur. Hinc etiam quedam periodica dicitur, quæ certis quibusdam temporibus redit: quedam semel tantum hominem ad-ritur, postea latet & quiescit.

XXVII. Sanguinis fluor, qui sanis per nares obtingit, morbosus non est, sed laudabile Naturæ benè operantis opus, quò hominem, illum maxime, qui vel sanguine abundat, vel eundem tenuem fervidumque habet, ob hepatis, aut victus caliditatem, ab imminentibus morbis præservat.

XXVIII. CAUSAE hemorrhagiae externae sunt atque interna.

XXIX. Externæ sunt caliditas aëris nos ambientis, anni temporis, regionis, aut astuariorum & stupharum ratione: diu-ternior sub Sole mora & ambulatio: cibi calidi, acres & mordaces: quales sunt aromatibus valdè conditi, aut sale multo imbu-iti: adhuc sinapi, raphanus esculentus & rusticanus, allium, cepa, porrum &c. Vina generosa & potentia. Exercitia corporis va-lida, saltando, luctando, equitando, remigando, currendo, digla-diando, aut alio modo instituta. Iracundia & excandescencia. Talia siquidem sanguinem inflammant, & attenuant, vasaque aperiunt, imò quedam eorum illa quoque rumpunt. Ad hoc cau-sarum genus externum etiam medicamina acris & mordacia, itemque res erodentes, contundentes, rumpentes, pungentes, & assiccantes, crebra narium frictio, referuntur.

XXX. Internæ sunt ἀνασώματος, orificiorum vasorum diductio, sive apertio: διάβρωσις, ἢ ἀναβρωσις, vasorum erosio: διαρρηξις, illorum divisio, seu disruptio: διατμήσις, tunicarum, quæ in vasis sunt, rarefactio. Has enim causas in genere omnis αἰμω-παγιδῆς esse Galenus L. 5. meth. med. c. 2. l. de sympt. differ. c. ult. & l. 3. de caus. sympt. c. 2. scribit.

XXXI. Ἀναστόμωσις verò fit vel à nimia sanguinis copia: vel ab ejusdem fervore & acrimonia: vel à tenuitate & aquositate: vel à retentricis infirmitate, non potentis vasa claudere, quo fit, ut reſeratis eorum osculis, sanguis effluat: vel à robore expultricis, gravata à sanguinis copia, aut laceſſite ab ejus prava qualitate. Duabus enim causis concurrentibus, fluxus fit concitator. Vid. c. 6. l. de diff. sympt. Galeni.

XXXII. Διαβρωσις ortum trahit à rebus erodendi virtute præditis, internis pariter atque externis: cujusmodi sunt illa, quæ acres sunt, mordaces, caustica, catharetica, & escharotica: uno verbo ab artis proceribus πυρωλικάς appellata.

XXXIII. Διαίψεσις causas habet res pungentes, quæ sunt acuminata: secantes, quæ acuta & tenues: contundentes, quæ graves & dura: rumpentes, ut sunt vociferatio ingens, violenta spiritus cohibitio, ponderis gravioris gestatio, aut elevatio, cursus admodum concitatus, saltus violentus &c. Hæ enim posteriores causa interventu τένσεως, tensionis, vasa disrumpunt, ait Galenus l. 5. meth. med. c. 2.

XXXIV. Διαπύκνωσις oboritur juxta Galenum l. 5. meth. med. c. 2. propter vasorum tunicas rarefactas, sanguinem attenuatum, & exilium vasculorum oscula dilatata.

XXXV. SIGNA DIAGNOSTICA quod attinet, nihil ijs opus est ad effluxus sanguinis è naribus cognitionem. Patet enim visui. Opus autem est diagnosticis, ut sciatur, per quem modum αιμορροαγία facta, & quæ illius causa existat.

XXXVI. Hemorrhagia, si per modum ἀναστομώσεως facta, cognoscitur, quando sanguis confertim affatimque exit, nec facile sisti potest.

XXXVII. Si διαβρωσις occasionem dedit, paulatim spatioque temporis accidit, non subito & derepentè oboritur.

XXXVIII. Si διαίψησις vasorum in causa est, sanguis subito & derepentè in majori quantitate, quàm in ἀναστομώσεσιν, egreditur.

XXXIX. Si διαπύδνσις ansam praebeuit, sanguis elabitur paucus, tenuis & serosus, qualis nonnunquam in hydropicis, hepaticis, & cachecticis effluere cernitur. Est enim διαπύδνσις soluta continuitatis species, per quam sanguis aquosus & tenuis per rarefactas vasorum tunicas quasi transcolatur, & sudoris in modum transmittitur,

XL. Si ἀνασώματος causata est à copia & redundantia sanguinis, id nobis innotescit ex ijs indiciis, quae plethoram praefaciunt: v. g. ex venarum tumore, rubore faciei, tensione venarum & musculorum, habitu corporis carnosus, ijs denique causis, quae plethorā producere solent: e.g. consuetudo alicujus vacuationis, v. g. uterinae, haemorrhoidalis, narium, suppressione, victu liberali & pleno, qui εὐγαλῶ, εὐχρηῶ, καὶ πολὺ πόφῶ, vita otiosa & sedentaria, etate juvenili, anni tempore vernali &c.

Si excitata à sanguinis fervore, subtilitate & acrimonia quadam, id venamur ex hepatis caliditate, cujus signa Galenus tradit in μικροτέχνη cap 37. aëris fervore, precedente victu calido, motibus validis & crebris, proclivitate ad iram, calidorum medicamentorum usu, balneis, tum siccis, tum humidis, &c.

Si nata ob tenuitatem & aquositatem sanguinis, id nobis sanguis ipse, qui emanat, manifestabit.

Si denique genita ab infirmitate retentricis, tunc ceterae quoque facultates ferè languent, & sanguis interpolatis vicibus effluit, isque non admodum copiosus: praecessit etiam ut plurimum affectus aliquis, qui hepar genusque venosum enervavit.

XLI. Quodsi διάσβωσις malum peperit, haecque profecta sit à rebus externis, v. g. catharteticis, escharoticis & causticis, signis non egemus. Causa namque liquet, eamque aeger Medico indicare potest. Sin processit à causis internis, humoribus scil. acerbis & mordacibus, quales sunt biliosi, porracei, & aruginosi, itemque pituitosi salsi & atrabilarij, aut ichores, serum & pus accredinis particeps, tunc cognitio peti potest ex colore & consistentia exsurgentis materiei, temperatura laborantis, diata antecedente, & si
totum

totum corpus κακόχουρον fuerit, etiam ex urinis & alvi egestionibus.

XLII. Denique si διαπύρεσις affectum produxit, sanguis quantitate paucus, stillatim guttatimque, qualitate verò tenuis & serosus profluere solet.

XLIII. Caterum, an hæmorrhagia critica sit, an symptomatice, facile apparet. Nam si contingat in morbo aliquo acuto, v. g. καύσῳ, synocha putrida, angina, visceris alicujus phlegmone, fiatque cum ἐνφροσίνῃ agri, illumque vel à morbo vindicet, vel saltem plurimum levet, & symptomatum vehementiam castiget; cadat insuper in diem criticum, sitque indice aliquo die præmonstrata, & præcesserint signa κρίσεως per ἀπορροαίαν futura, ut: pote rubedo oculorum, genarum, & narium, visus caligo, aut marmaruges, h. e. splendores ante oculos obversantes, lachrymarum effluxus spontaneus, cephalalgia gravans, atque distendens, articularum in temporibus pulsatio, narium pruritus, aurium tinnitus, desipientia, vigilia, tensio cervicis, pulsus magnus & validus, dyspnoea, thorace velut angustiore factò, hypochondriorum retractione, quæ ultima signa humores superiora corporis membra petere ostendunt, critica dicenda est; præsertim si & ætas decumbentis sit juvenilis, & ætas, æstivaque aëris καλῶσεως fuerit præsens, & temperamentum agri calidius, & constitutio ejus plethorica: quemadmodum pulchrè & eleganter hæc indicia præfaga Galenus tùm l. 3. de crisib. c. ult. tùm etiam l. 1. de cur. rat. ad Glaucon. cap. 15. proponit. Symptomatice autem, cum evenit statim in principio morbi, nullo cum agri levamine, & excitata tantùm sit ob sanguinis copiam, naturam gravantem, vel ejusdem caliditatem & acredinem illam irritantem & ad excretionem stimulantem, vel etiam, quod quandoque in variolis, morbillis, febribusq; malignis & pestilentialibus accidere consuevit, ob illius κακότητα.

XLIV. Emanavit autem sanguis immediatè ex venis narium, cum impetuosè non erumpit, neque diu durat, sed facile

refrigerantium & adstringentium usu sistitur. Talia enim naribus admoventur, viribusque integris ad locum pertingunt affectum. Venae autem narium, quia exiles sunt & paucae, non admodum sanguine abundant. Ideoque copiosum reddere sanguinem non possunt. Possunt autem effundere largum vasa interiora, quae cerebri sunt & meningum. Itaque si sanguis emanet in copia, & fluxus diu perseveret, nec compesci facile queat, praegressaque sint signa precedenti thesi commemorata, si non omnia, saltem pleraque, statuendum, fluorem à vasis cerebri & meningum suam habuisse originem.

XLV. Cognosces autem sanguinem exisse ex arteriis, si rutilus sit, clarus, tenuis, spirituosus, qui cum saltu quodam exiliat, spumosus, agrumque valde debilitet. E venis autem effusum esse deprehendes, si fuerit crassior, tenebricosior, impurior, minusque vires infirmet, & hepatis topicis refrigerantibus, adstringentibus, aut divertentibus appositis, fluxus vel cesset, vel saltem remissior evadat.

XLVI. Sequuntur P R O G N O S T I C A.

Enormes & immodica sanguinis per nares eruptiones spiritus exhauriunt, calorem nativum penè extinguunt, concoctionem laedunt, decolorationem efficiunt, cruditates gignunt, apoplexiam, paralyseon, καχεξίαν & hydropem inducunt, totum corpus refrigerant, & jecoris ac ventriculi adferunt debilitatem. Galen. l. 9. meth. med. c. 10. Quod tamen etiam de omnibus alijs immoderatis sanguinis profusionibus intelligendum quae praeter affectus modò recensitos etiam leipothymiam, syncopen, tandemque mortem pariunt.

XLVII. Gordonius in lilio Medic. part. 3. c. 17. & Valescus l. 2. c. 59. scribunt, si fluxus sanguinis narium se extendat ultra libras 4. malus est. Si ultra 8. pessimus. Si usque ad 20. vel 24. lethalis. Addunt insuper, si in fluxu extrema frigeant, si facies appareat pallida, viridis, aut livida, sive plumbea, signum esse itidem θανάσιμον. Authores tamen thesi 3. allegati, sanctè

sanctè affirmant, convaluisse agros suos, quib. sanguinis libræ 18. 20. & 40. effluxerant. Verùm rara hæc sunt & prodigiosa, & ut Averroës loqui solebat, monstris similia: nec nisi robori Natura accepta ferenda. Quib. adnumerari potest rarissimum illud exemplum, quod Savonarola tradit tract. 6. prax. c. 5. rubr. 3. Mulier, ait, gravida, ex familia Zabarellorum Patavinorum oriunda, libras sanguinis circiter 22. è narib. profudit: quæ tamen peperit, & unâ cum fœtu supervixit.

XLVIII. Sanguinis fluxiones, ἀπὸ τοῦ πύου, Verno potissimum tempore hominibus obtingunt: Hippocrates sect. 3. aphor. 20. Inaudit autem omnes sanguinis profusiones, sive per nares (quæ profusiones in specie ἀπορροαίαι dicuntur) sive per hæmorrhoidas, sive per uterum, sive per vomitum, sive per partem aliam fiant. Quæ vacuatio illis præcipuè accidit, qui sanguinem vel ob crasim sanguineam, vel victum plenum ac liberalem coacervârunt: idque eò magis, quia juxta Hippocratis placitum lib. de Nat. hum. sanguis verno tempore dominatur, & quotidie incrementum capit. In causa est summa aëris temperies. Ideoque natura sanguinis quantitate gravata sese exonerare studet. Non solum autem à sanguinis copia, sed etiam ab alijs humoribus sese verno tempore liberare satagit. Hinc Hippocrates eodem in aphorismo aegritudines ex κακοχολία genitas addit: & genitas quidem vel ex κακοχολία melancholica, ut maniam, leprâ & melancholiam: vel ex pituitosa, ut gravedines, raucedines, tusses: vel ex biliosa, ut pustulas ulcerosas: vel ex serosa, ut articulorum dolores &c. Solet enim natura hoc tempore profundum corporis expurgare, & fædas superfluitates à partibus interioribus, tanquam nobilioribus, ad exteriores, utpote viliores, amandare: sic dictante Galeno in comment. aphorismi allegati. Natura namque Vere ob caloris, sanguinis, & spirituum abundantiam est valida satis atque robusta: via ob teporem aëris sunt patefacta: ipsique humores fusi quasi & liquati, adeoque ad excretionem parati.

XLIX. Eadem p̄v̄as αἵμας & ἐκ πινῶν pueris maxime grandioribus & ad pubertatem accedentibus, qui jam, ut Hippocrates l. 6. epid. sect. 3. loquitur, ἀφροδισιάζεν ἀρχοῦναι, & ἰσχυρίζεν, Venerem appetere & hircire, h. e. asperiores reddere vocem incipiunt, similitudine à vocis hircine asperitate desumpta, accidunt, ait idem Hipp. ibid. & aphor. 27. sect. 3. Causa juxta Galenum comm. 3. in l. 6. epid. §. 25. est duplex: Vna, sanguinis abundantia: altera ejusdem caliditas. Ante hanc ætatem aderat quidem etiam sanguinis copia, inquit idem, verum haud pariter multus: quoniam tūm magis corpus crescebat. In comm. citati aphor. dicit Galenus, causam esse, quia tempore pubertatis sanguis abundare incipit, non quòd tunc plus de eo generetur, quàm prius, sed quòd tunc minus ex ipso absumatur, propterea quòd & augmentum minus sit in hac ætate, quàm priore, nimirum pro corporis proportionem. Ob πολυαἱμίααν & caliditatem etiam sanguinei & cholericī magis hæc malo expositi sunt, quàm phlegmatici & melancholici.

L. Capite dolenti & vehementer laboranti pus, vel aqua, vel αἷμα πῶεν κατὰ τὰς πῖνας, sanguis per nares, aut os, aut aures effluens morbum solvit. Hipp. aphor. 10. l. 6.

Emissaria, per quæ superfluitates capitis excernuntur, sunt duplicia: ordinaria & nature consueta: pori cutis, pericranij, meningum, cerebri, per quos halitiosa evacuantur excrementa, & nares atq. palati foramina, per quæ educuntur humores noxij. Extraordinaria sunt oculi & nares. Hic utrorumque fit mentio. Pus per hæc loca eicitur, suppurata cerebri inflammatione. Aqua & pituita efferuntur, præsentibus humoribus crudis. Sanguis per nares effluit, copia ejus naturam gravante. His evacuatis, fieri nequit, quin dolor, inde natus, desinat: quoniam ab ijs, tanquam à suis causis, dependebat. Quodsi spiritus flatulentus dolorem peperit, hisce vacationis generibus dolor non cessat, sed potius discutientibus & extenuantibus remedijs evanescit. Sin dolor ortus sit à bile acri atque mordaci, dolor χολαγωγός, & alterantibus præsidys finitur.

LI. Mulieri menstruis præter naturam deficientibus, αἷμα ἐκ τῶν πινῶν πρὸς τὰς, sanguinem ex naribus profluere, bono est. Hipp. aphor. 33. sect. 5.

Necessarium, inquit Galenus in comm. est, sanguinem mulieribus singulis fluere mensibus. Noxium autem, illum præter naturam retineri. Tolle verò noxam, per locum alium vacuetur. Vacuari autem posse per loca multa. Sed innoxie per nares. Per alia non item. Per alia tamen exire, detrimentosius esse, per alia minus. Laudare Hippocratem fluxum sanguinis per nares: sed non hanc solam viam approbare. Convenientem esse & illam, quæ fit per sedem. Quod licet Hippocrates non expressè dixerit, in more tamen positum habere Galenus scribit, ut uno & singulari posito exemplo, per illud similia alia subintelligat.

LII. Quibus per febres aures obsurduerunt, ἢ αἷμα ἐκ πινῶν πρὸς τὰς, sanguis ex naribus profluens, aut perturbata alvus morbum solvit. Hippocrat. aphor. 60. sect. 4. Simile prognosticum habetur aphor. 28. sect. 4. inquit Galenus in comm. Vbi Hippocrates scriptum reliquit, surditatem fieri, excrementis biliosis retentis, & ad caput recurrentibus: talemque surditatem cessare, alvo turbata, & bile per inferiora dejecta: dummodò non hectica fuerit surditas, sed repente in febribus facta. Bilis quippe, cum meatus auditorios occupaverit, surditatem efficit. Cum verò natura hanc ipsam per alvum evacuet, rationi consonum est, surditatem evanescere. Allegato verò in aphorismo Hippocrates docet, laxatam alvum, & αἰμορροαίαν varium surditatem in febribus factam, absque ulla tamen propria & præcipua organi auditorij passione, finire. Nihil autem mirum, subdit Galenus in comm. si cum evacuantur ac transmutantur noxii humores, morbi desinant.

LIII. Vbi spes est ad articulos abscessum iri, abscessu liberatæ urina multa crassa, & alba reddita, qualis in febribus κοινώδεις, laboriosis, quarto die quibusdam exire incipit. Quod si ἐκ τῶν πινῶν αἰμορροαίῃσιν, sanguis etiam ex naribus profluxerit, brevi admodum fit solutio, Hippocrates aph. 74. f. 4. Per

Per abscessus & decubitus febres chronica magna ex parte judicantur, inquit Galenus l. 3. de cris. c. 3. Aliquando tamen secus fit, & materia cruda crassaque, ex qua tales febres nascuntur, per urina vias exfluxus evacuatur; unde urina multa crassa & alba apparet: qualis in febribus laboriosis, non qua vehementem motum & exercitium secuta, sed qua à cruda crassa materia, etiam nullo progressu exercitio, genita, & in quib. tamen agri lassitudinem magnam sentiunt, quibusdam die quatuor effluere incipit. Non autem quarto solum, subjungit Galenus in comm. sed etiam alio quovis indice, & decretorio. Exempli enim gratia quarti solum meminit Hippocrates, sed more suo etiam alios inaudit. In ejusmodi igitur febribus lassitudinariis expectari quidem solet abscessus, & quidem ad articulos, utpote membra frigida, laxa, & debilia, alienam materiam facile admittentia, nec illam amplius ob infirmitatem naturæ suæ propellentia: verum valida natura materiam abscessus quandoque ad ductus urinarios convertit. Vnde fit, ut aliò translata abscessus præcaveatur. Quod si calor febrilis sit intensior, tunc etiam sanguis è naribus fluit: & quia is materiam ad caput propellit, eam emunctoria cerebri, parotides, suscipiunt, indeque intumescent.

LIV. Quæ diebus criticis ex ἀποπρᾶγία incidit πρὸς τοὺς ὤφθους, perfrigeratio magna, pessima est. Hippocr. in Coacis.

Vt nihil, ait Duretus in comm. paucum in xpietate est criticum, sic omne nimium, quantumvis criticum, est periculosum. Quemadmodum igitur sanguinis substilla prava sunt, idque potissimum die critico, ut omnes judicatoria causa exigua, ita profusior omnis hæmorrhagia debet esse terrifica. Talis autem est merito, & ut causa, & ut signum. Vt causa, quoniam corpus reddit frigidissimum, eosque introducit affectus, qui supra recensiti. Vt signum, quia retentricis infirmitatem prodit, non possentis venarum oscula claudere, & sanguinem retinere.

LV. Sanguinem ἀνάπαλιν è naribus fluere, malum: ut in
liene magno è dextris, atque similiter in hypochondrijs. Hippocr.
In Coacis.

Sensus aphorismi istius est, omnem αἱμορροαγίαν, quæ sit καὶ
ἔξω, καὶ ἐνθῦ, siue καὶ ἐνθυωρίαν, bonam esse: malam contra, quæ
sit ἀνάπαλιν, è diverso, seu contra directum. Τὸ καὶ ἔξω autem
à natura observatur, si v. g. hepate laborante sanguis fluat è na-
re dextra: τὸ δ' ἀνάπαλιν, si erumpat è nare sinistra. Ita si is in
lienjs phlegmone exeat è nare sinistra, exire καὶ ἔξω dicitur: sin
è nare dextra prodeat, ἀνάπαλιν. Quam vacuandi rationem
Galenus libr. de curat. per S. M. c. 15. & 16. vehementer lau-
dat, & experientia confirmat, quæ testatum fecit, vacuationes
καὶ ἔξω factas profuisse semper: hisce verò contrarias nihil ju-
visse: imò interdum etiam nocuisse plurimum, quòd scil. vires
solum, citra morbi levamen, dejecerit atque exolverit. Sic nam-
que in corpore nostro comparatum est, ut dextra dextris, sinistra
sinistris sint ὁμόφυλα καὶ ἐντὸς φύλα, consocialia.

Per hypochondria autem hoc loco interpretes, inter quos
Duretus & Hollerius primi, intelligunt hepar. Vox enim hy-
pochondriorum accipitur variè. I. συνεκδοχικῶς pro toto imo
ventre: ut aphor. 73. sect. 4. II. μελωνομικῶς, pro partibus in
hypochondrijs sitis. III. ἀντονομασικῶς, pro dextro: ut histor.
2. sect. 1. l. 3. epidem. de Hermocrate. IV. κυρίως καὶ ἰδίως, pro
lateralibus regionis epigastricæ partibus, quæ τοῖς χόνδροις, carti-
laginibus notharum costarum adjacent. Hypochondria namque
dicuntur, quòd sint ὑπὸ τῶν χόνδρων, vel quòd τῷ χόνδρῳ ὑπὸ κήλαι,
cartilaginibus notharum costarum subjaceant.

LVI. Quæ σκοτώδεια, vertigines tenebrosæ ciuntur ab
initio, αἱμορροίη ρινὸς λύει, sanguinis profluvium è naribus sol-
vit. Hippocr. in Coacis. Vertigo, δῖν, affectus est, in quo
omnia circumagi & in orbem verti videntur: cui si tenebra ac-
cedant, adeò ut ager visu privetur, composito nomine σκοδόδῖν
vocatur, tenebrosa vertigo. Causa est inordinata spiritus fla-

tuosi crudique motio, qui vel in capite primum genitus est, vel sursum ex infernis partibus, v. g. ventriculo, liene, intestinis, utero &c. ascendit. Genitus autem in capite est, vel ex sanguine inibi redundante, vel ex cacochymia privata. Solvit igitur αιμορραγία narium vertiginem plethoricam, non cacochymon. Hanc enim purgatio tollit. Et solvit plethoricam, quæ non cum inflammatione, aut intemperie capitis calida conjuncta. Hisce enim affectibus presentibus, vertigo persistit, non obstante sanguinis ex naribus eruptione. Dicit autem Hippocrates ἐξ ἀρχῆς circa initia, scil. acutorum morborum sine ulla κρίσις significatione. Nulla enim κρίσις in principio morborum fieri solet, inquit Galenus l. 3. de cris. c. 3. 6. & 10. quia tunc temporis morbifica materia adhuc est cruda, multoque minus ab utilibus humoribus separata, & ad excretionem disposita. Κρίσις enim bonam & salutarem præcedunt πτωσις & διάκρισις, concoctio & secretio heterogeneorum: sequitur ἐκκρίσις ipsa, quam ταραχὴν κριτικὴν antegressa: absoluto κρίσις actu, ἢ εὐφορία, bona agrotantis tolerantia insequitur, quod Galenus in opere critico sæpè inculcat.

LVII. Quib. in febr. sanguinis undecunque copia eruperit, convalescentibus ventres humectantur: Hippocr. aphor. 27. sect. 4.

Similis aphorismus habetur apud eundem in Coacis, quib. αιμορραγία profusior est, labentibus inde diebus alvi πονηρεύοντες, labefactantur, nisi urina cocta reddatur.

Hoc symptoma commune quidem est cujuscunque sanguinis profluvij largioris, ex quacunque parte id fiat, non malè tamen ad narium hamorrhagiam in specie accommodari potest. Causa est, inquit Galenus comm. 4. aphor. 27. quia ob ejusmodi αιμορραγίαν calor admodum debilitatur, ex quo viscera concoctioni & distributioni alimenti dicata neque benè concoquere, neque cibum in sanguinem convertere, neque in corpus distribuere queunt. Idcircoque necesse est, alvos fieri humidiores, donec progressu tempo-

temporis natura vires suas recuperaverit : quod factum judicatur, si urina cocta apparuerit.

LVIII. Profusa narium ἀπορροαία violenter suppressa, σπασμὸν nonnunquam parit. Sanat autem sanguinis detractio per phlebotomiam. Hippocr. in Coacis.

Sunt quidam ita meticulosi, ut lethale arbitrentur, si sanguis, etiam modicè, è naribus emanet. Putant enim, vita thesaurum effluere non debere. Proinde sistere statim ἀπορροαίαν satagunt, non praesidiis revulsoriis, sed refrigerantibus, adstringentibus, & repellentibus topicis, naribus, fronti, temporibus, & collo admotis. Idque eò magis, quò sanguis majori cum impetu erumpit. Verùm Hippocrates hoc dissuadet, innuens, si narium sanguis Bīq. vi sistatur, tūm symptomata alia, tūm etiam convulsionem supervenire. Ut enim hemorrhoidibus longo tempore consuetis, si inconsideratè supprimantur, secundum Hippocratem aph. 12. sect. 6. periculum tabis, aut hydropis, & secundum alios melancholiae, scirrhi, canceri & leprae impendet, ita haemorrhagia narium in-tempestivè cohibita, convulsio, epilepsia &c. succedunt. Hinc illud Hippocratis in Coacis, qui statis temporibus sanguinem fundunt, si non profuderint, epileptici fiunt. Hac quippe vacuatio in sanis, qui sanguine abundant, saepè naturae opus est. In acutis morbis non rarò critica est. At quae judicantur, sistenda sunt, non impedienda, ait idem aphor. 20 sect. 1. Subdit autem Hippocrates, ἀπορροαίαν ejusmodi phlebotomis sistendam esse, siquidem eam sistere necesse fuerit. Nam vena sectio sanguinem retrahit, & à naribus avertit, si nimirum hoc in casu humeraria brachij καὶ ἔξω incidatur.

LIX. Substilla sanguinis, (αἷ σάξες) mala sunt, idq. cum aliàs, tūm si bis fiant, & redeant. Hippocr. in Coacis.

Substilla sanguinis sunt, quib. ille guttatione, pigro lapsu, & parcè fluit. At ijs peccans materia tota non evacuat. & propterea recidivam juxta aphor. 12. sect. 1. patiuntur agri, ὅς τὰ ἐγκαταλιμνωόμενα, ea, quae relinquuntur. Galenus ad aph. 47.

sect. 2. l. i. prorhet. hoc habet edictum, τῶν κρισίμων ἔδειν σμικρὸν
 ἓνα προσήκει, eorum, quæ critica sunt, nihil paucum esse conve-
 nit. Rationem hanc subjungit, quia quod paucum excernitur,
 aut malignos & multos humores naturæ dominatu regi non pos-
 se, aut summam naturæ fatiscentis exolutionem denunciat. Idem
 judicium fert de sudatiunculis in prognost. quas, si miliares fue-
 rint, & circa cervicem duntaxat & claviculas apparuerint,
 pessimas proclamat. Idem sentit Hippocrates aphor. 47. sect. 2.
 l. i. prorhet. de vomitu exiguo, quem κακὸν pronunciat. Et in
 Coacis τὰς ἐλαχίστας σάξιας, perexigua sanguinis stillicidia, κα-
 κὰς similiter judicat: idque l. i. epidem. sect. 3. Philisci, Epa-
 minonis, & Sileni exemplo confirmat, qui interierunt, quod
 pusillum quid è naribus stillaverit: σμικρὸν, ait, ἀπὸ ῥινῶν ἔσαξεν,
 καὶ ἀπέθανον. Addit autem Hippocrates, substilla sanguinis mala
 esse, tum aliàs, tum si aliquoties redeant. Nam quò sapiùs na-
 tura irritatur, & irrita tamen inanisque ejus est conatus, eò pejor
 ager se habere solet.

LX. Sanguinis è naribus fluxus die septimo, nono, & de-
 cimo quarto febres ut plurimum solvit. Hippocr. in Coacis.

Febres scil. acutas atque ardentes, quales sunt synocha, &
 quæ in specie καύσοι appellantur. Criticus enim est ille fluxus:
 peccans materia educitur per ἑμφύροια χωρία, convenientia lo-
 ca, cessatque febrilis calor, & alia febris symptomata disparent.
 Idem tamen narium fluxus salutaris quoque est in phrenitide,
 angina, pleuritide, peripneumonia, phlegmone hepatis ac lienis;
 Avicenna eundem etiam probat in variolis & morbillis. Bre-
 viter, omnis sanguineus narium fluxus bonus est, qui fit cum al-
 leviatione patientis. Signum quippe est, causam tolli, si non tota-
 liter, saltem aliqua ex parte.

LXI. Superest CURATIO, quæ pro varietate causarum
 variat. Respicendum autem hic est I. ad morbum, unde fluor
 manat. II. ad sanguinem ipsum, qui effluit. III. ad sympto-
 mata, nimirum ad facultatem retentricem & fluxum sanguinis

LXII. Morbus vasorum. unde fluor prodit, est, sicuti supra dictum, vel eorum ἀνασώματος, vel διαίρεσις, vel διάσβεσις, ἢ ἀνάσβεσις, vel διαπύδνσις.

LXIII. Sanguis peccat aut in quantitate, cum nimis abundat: aut in qualitate, quando vel calidior & acrior, vel tenuior & aquosior existit.

LXIV. Retentrix vasorum virtus aliquando adeo debilis est atque infirma, ut neque vasa claudere, neque sanguinem retinere valeat.

LXV. Fluxus quidem sanguinis symptoma tantum est, sicut & infirmitas vasorum, ac propterea ambo neque curatione, neque preservatione opus habet, cum remotis causis ultrò desinant. Quia tamen fluxus nonnunquam vehementer urget, naturamque causæ induit, ejusque, ut Galenus de omnibus in universum symptomatibus urgentioribus lib. 12. meth. med. cap. 1. monet, vel vires nimio opere prostermentis, vel novum morbum producentis, vel presentem affectum foventis, idcirco ea cura illi debetur, quæ causis adhiberi consuevit.

LXVI. Quapropter, si ἀπορροαία facta sit per ἀνασώματος, orificia vasorum claudenda sunt. Si per διαίρεσιν, vasa glutinanda. Si per διάσβεσιν, itidem consolidanda. Si per διαπύδνσιν, condensanda. Perpetuò enim contraria contrariis opponenda.

LXVII. Si sanguis peccet in quantitate, minuendus. Si in qualitate acris, & calida, temperandus & refrigerandus. Si in tenui & aquosa, incrassandus. In utroque etiam vitio purgandum, bilis & feri causa.

LXVIII. Si virtus retentrix debilis sit, roboranda venit.

LXIX. Fluxus ipse sanguinis coercendus & compescendus, siquidem sit enormior, viresque deiciat, aut symptomaticus, nihil agrum juvans, sed tantum illum enervans.

LXX. Sinendus autem, si fuerit criticus, aut naturæ opus in sanis.

LXXI. Hac est legitima & methodica ἀπορροαίας curatio, quæ indicationibus nititur, nobisque juvantia præsidia palam facit. Reliquum est, ut ad præsidiorum materias descendamus, & quib. remedijs dictis indicationibus satisfaciendum sit, significemus. Depromemus verò illas ex monumentis artis Antesignanorum, Galeni l. 3. de compos. med. κ. τὸ π. c. ult. Pauli l. 3. c. 24. Aëtij tetr. 2. ferm. 2. c. 94. Tralliani l. 3. c. 8. Avicennæ l. 3. Can. fen. 5. tract. 1. c. 9. Mesuæ l. 2. suum. 7. c. 2. & Serapionis tract. 2. cap. de sang. flux. è narib. ex quib. pleraque omnia, quæ ad pharmaciam spectant, superiorum atatum Practici, Gordonius, Valescus, Nicol. Florentinus, Guainerius, Gattinaria & Matth. de Gradib. hauserunt.

LXXII. Ut autem simus breviores, nihil peculiariter dicemus de ijs remedijs, quæ vasorum oscula claudunt, quæ vasa consolidant, quæque eadem condensant: quoniam sub illis comprehenduntur, quæ fluxum sanguinis coercent: cujus generis sunt adstringentia, refrigerantia & emplastica. Nil quoque in medium proferemus in specie de roborantibus retentricem virtutem, quoniam sub adstringentibus inaudiuntur. Considerabimus ea duntaxat, quæ fluori sanguinis medelam adferunt.

LXXIII. Adferunt autem primum illa, quæ sanguinem divertunt, derivant & intercipiunt, ne ad nares accurrat. Deinde quæ fluxum ejus sistunt.

LXXIV. Divertunt & à naribus avertunt sequentia. Primum Venæ sectio καὶ ἔξω in humeraria brachij maturè instituta, priusquam vires deficiant: & quidem vicib. iteratis, brevi interposito tempore, ter quaterque in die: ut Natura via alia monstretur, eidemque illa paulatim assuescat: dummodò laborantis vires ita adhuc sint comparata, ut sanguinis detractionem tolerare valeant.

Deinde Cucurbitulæ magnæ, sine scarificatione hypochondriis affixa, dextro scil. vel sinistro, aut etiam utrique, pro ut ex mare dextra, sinistra, vel utraq. sanguis fluxerit. Affixa etiam cervici,

vici, interscapulio, & dorso, cum scarificatione: itemque sub mammis in sexu fœminino.

Tertiò Apertio venarum hæmorrhoidalium, præsertim si sanguinis fluor lienis causa sit obortus.

Quartò Ligaturæ dolorificæ brachiorum & pedum.

Quintò Frictiones extremorum deorsum factæ: & duriores quidem, ut partes inde rubeant, & sanguis à capite avocetur.

Sextò Sanguisugarum applicatio post aures.

Septimò Lavacra calida artuum inferiorum consulunt multi: verum suspecta videntur propterea, quòd etatis ex aqua calente vaporibus, tum partes cetera, tum vel imprimis etiam caput incalescat, & sanguis postea majori in quantitate erumpat.

Octavò Purgantia, si non solùm sanguis abundet, sed plethora etiam adjuncta sit κακoχoρμία, biliosa præsertim & serosa. Ea enim & vacuant, & revellunt. Usurpanda autem mitiora: v. g. Manna, Tamarindi, Myrobalani citrina & chebula, Rhabarbarum, Cassia fistularis, Syrup. rosar. & violar. solut. simplex, Syrup. de cichor. cum rhabarb. Syrup. è florib. persicor. Syr. è rhabarb. &c. In κακoχoρμία vero phlegmatica Φλεγμαγωγά: utpote agaricum, myrobalani chebula, mel rosar. sol. Syr. de agar. & diacnicu. In melancholica μελαναγωγά: nimirum sena, epythymum, myrobalani Inde, decoct. & syr. è sena. Suadent quidam Practici, aquam frigidam per intervalla in faciem agri incogitantis conijciendam esse, ut illo perterrefacto sanguis ad interiora revocebur.

LXXV. Revulstonum prasidijs usurpatis, ad ea accedendum remedia, quæ sanguinis eruptionem sistunt.

LXXVI. Sunt autem interna atque externa: manifesta vel occulta qualitate agentia. Manifesta sanguinem compescunt, vel refrigerando, vel incrassando, vel adstringendo, vel infarciendo & obstruendo, vel urendo. Occulta, vel narcotica, vel alia, quæ verbis exprimi non potest. Vtriusque generis recensere plurima, ut in conspectu Artis Studiosi habeant, quæ à Pragmaticis passim literarum monumentis sunt consignata.

LXXVII. Externa, quæ alias topica vocantur, varijs modis varijsque partibus admoventur: v.g. naribus, fronti, faciei, temporibus, cervici, collo toti, axillis, hypochondrijs, sub quibus hepar & liex comprehenduntur, testiculis, volis manuum, plantis pedum, carpis, & mammis in fœminis.

LXXVIII. Intrinsecus usurpantur refrigerantia, incrasantia & adstringentia: duo priora sanguinis gratia, qui refrigeratus & crassior factus ad motum fit pigrior atque ignavior. Posteriora vero vasorum causa, quorum orificia sunt claudenda.

LXXIX. Sanguinem refrigerant ex aquis, aq. lactucae, violarum, solani, papaveris albi, papaveris rubri, sive erratici, nymphaeae, sempervivi, alsines, endiviae, omnium florum, roris Majalis &c.

Ex Julepis, jul. rosar. & violat.

Ex Syrupis, syr. violarum, syrup. papaverin. syr. nymphaeae, syr. endiviae, diacodium.

Ex Conditis, lactuca Hispan. condita, rad. cichorii condita.

Ex Conservis, conser. violar. cons. nymphaeae.

Ex hac materia & julepi, & electuaria confici solent.

LXXX. Vasa constringunt & occludunt ex Aquis, aq. rosar. plantaginis, centinodiae, hippuridis, bursa pastoris, portulacae, acetosae, folior. quercus, tormentillae, anserinae, cydoniorum, cupular. glandium, fragorum, fragariae, millefolij.

Ex Syrupis, syr. acetositat. citri, granator. acidor. ex succo limoniorum, auranciorum, acetosae, berberum, ribium, uvae immatura, sive agrestae, cydoniorum, fragorum, syrup. portulac. rosar. siccar. rubi Idaei, corallinus, myrthinus.

Ex Conservis, Conser. acetosit. citri, acetosae, rosar, rubrar. acetosella.

Ex Conditis, berberes condit. ribesia condit. cynosbat. condit. myrobalan. condit. pyra moschatell. condit. cydonia condit.

Ex Trochiscis, troch. de rosis, Ramich, de spodio, de terra sigillat. de carabe, de berberib. de camphora. Quæ materia similiter in julepos & electuaria aptari potest.

LXXXI. Hisce internis medicamentis adduntur, quæ vi narcotica sanguinis fluorem sedant, non tamen nisi summa urgente necessitate, nec nisi viribus adhuc valentibus assumenda. Talia sunt, Laudanum opiatum Paracelsi, Requies Nicolai, Philonium Persicum & Romanum, Opium ipsum, Micleta Nic. Ad interna ischæma, sed occulto modo agentia, referri quoque potest Sperniolæ Crollij compositum, quantitate avellane cum aqua plantaginis haustum. Ait enim, remedium esse ad quamvis sistendam *αμωππαγία* efficacissimum.

LXXXII. Extrinsecus applicantur ex ordine quidem eorum, quæ manifestis operantur qualitatibus, nimirum refrigerando, incrassando, reperiendo, adstringendo, infarciendo, urendo, sequentia, quæ partibus thesi 77. enumeratis adhibentur.

Aquæ jam proposita, aut per se, aut cum succis & pulveribus mixta.

Acetum rosarum, papaveris errat. & rubi Idæi, cum spongia naribus oblatum. Vapor item naribus exceptus, qui exurgit ex aceto candenti lapidi molari infuso. Hoc enim remedio Aëtius laudem consecutus est non exiguam.

Oxycratum, sive Posca, quæ mixtura est ex aqua simpl. & aceto.

Oxyrrhodinum, quod compositio est ex olei rosar. partibus tribus, & quarta aceti. Additur à quibusdam etiam aq. Rosar.

Succi plantarum refrigerantium, adstringentium & incrassantium, ex quib. aquæ recensitæ fuerunt elicite. Item hypocisthidos & pruneolorum sylvestr. qui est Germanorum Acacia.

Pulveres, qui naribus insufflantur per cannulam.

Turundæ, quæ iisdem infiguntur.

Frontalia, quæ fronti temporibusque imponuntur, cum lin. teaminibus, spongia, xylo, stuppa.

Epicarpia, quæ carpis, sive brachialibus admoventur.

Errhina, sive nasalialia, quæ naribus hauriuntur.

Epithemata, quæ hepati applicantur, aut testibus circumligantur.

Embrochæ ad suturam coronalem factæ.

Emplastra & Cataplasmata ex pulverib. farinis, aceto, aut oleis adstringentibus concinnata, frontique admota.

Anacollemata, h. e. talia remedia, quæ naso, fronti, aut cervici quasi agglutinantur.

Fumi & vapores, qui naribus excipiuntur.

Periammata, quæ collo appensa gestantur.

LXXXIII. Materia verò talium pharmacorum præter aquas, aceta, & succos jam dictos, sunt, pulvis rad. tormentill. rad. bistore. rad. pentaphyll. rad. consolid. major. baccar. myrthi, nuc. cupressi, rosar. rubrar. balaustror. malicorij, gallarum, croci Martis, sanguin. Dracon. boli Armen. Terr. sigillat. terre Lemnia, aloëpatice, thuris, myrrha, mastichis, succini, lithargyri, cornu cerv. usti, santali rubri, rubricæ fabrilis, farina volatilis, farina fabarum. farina lentium, farina triticea, farina amyli, gummi Arabic. gumm. Tragacanth. gypsum &c. qui pulveres cum ovi albumine, aut commemoratis succis & acetis mutari possunt in multas formulas.

LXXXIV. Caustica topica, sive actualiter, sive potentialiter urant, sanguinis quidem fluorem arcent, crustas, tanquam opercula, inducendo, ut chalcitis, calx viva, vitriolum, as & alumen ustum, colcothar: verum cum terribilia plerisque sint, præferim ferramenta candentia, & etiam dolorifica, imò & propter vicinitatem oculorum & cerebri non satis tuta, rarò a Practicis adhibentur, nec nisi in casu deplorato. Huc accedit & ista ratio, quoniam crusta, quam induxerunt, sponte, aut voluntate nostra ablata, fluxus redire solet.

LXXXV. Ex iis, quæ occulta qualitate sanguinem cohibent, forisque applicantur, sunt, fungus ille orbicularis, quem ridiculè crepitum lupi, nostri barbitonfores Bubenfist appellant; lapis hematites, corallia rubra, & tinctura illorum, jaspis, cornalinus, magnes, usnea, sive muscus ille, qui cranij hominum defunctorum innascitur, siccus, & pulverisatus, naribusq.

ribusque inflatus, aut sindoni rubra inditus, & de collo suspensus.

Stercus porcinum, aut asininum in nares inscio agro intrusus: aut succus ex illo expressus & cum bolo Armena subactus.

Spongia in forti aceto macerata: post arefacta & in fictili cremata.

Cinis charta combusta.

Bombax, sive Gossypium combustum.

Pili leporini, praesertim albi, ustione in cineres redacti.

Cinis asellorum, qui sub hydriis, seu vasis aquariis stabulantur.

Sanguis columbarum, perdicum, turdorum, & turturum, similiter igni in cineres conversus.

Lapis carpionum in ore detentus.

Succus urticae majoris, porri, menthae, ocyimi majoris cum camphora.

Herba anagallidis maris, quae phaenicei est coloris, in manibus gestata, ut & bellidis majoris.

Tela araneorum mixta cum alijs.

Cochleae cum domicilijs suis crematae, & cum succo, aut aqua aliqua, aut cum ovi albumine mixtae, & naribus, fronti, temporibusque adhibita.

Folia & cortex salicis, praecipueque lanugo & flores naribus inserti: aut redacti in pollinem, & calamo in nares efflati.

Bufo palo transfixus, exiccatus, in pulverem tritus, linteolo, vel sindoni involutus, inque manu, donec incalescat, detentus.

Aqua ex spermate ranarum verno tempore destillata, & cum linteis admota fronti, temporibus, naribus. Miscetur & cum camphora & saccharo Saturni, colloque cum imbuta linteamine alligatur.

Semina cardui benedicti naso admota.

Testae, sive putamina ovorum, in forti aceto macerata, donec mollescant, post siccata, & in pulverem redacta,

Radix Pæonia lingue subdita.

Radix melanthij masticata, naribus inserta, & de collo suspensa.

Radix cichorij albi circa festum D. Jacobi collecta, & dentibus contrita.


LXXXVI. *Alia remedia, utpote verba, preces & incantamenta carminum, quorum Plinius l. 28. c. 2. meminit, & aliquot illorum formulas Nicolaus Florentinus serm. 3. tract. 7. c. 2. proponit, silentio involvimus. Sunt enim partim superstitiosa, partim impia. Ideoque etiam Plinius, tametsi aliquid verbis & characteribus in medicatione morborum tribuere videatur, & carmina contra ambusta, aliaque agritudinum genera extare perhibeat, ingentem tamen obstare verecundiam in tanta animorum varietate scribit, quo minus illa divulgentur. Proinde permittit, ut is, pro ut libitum cuique fuerit, opinetur.*

LXXXVII. *DIAETAM quod spectat (actum namque hactenus de cheirurgicis & pharmaceuticis præsiidiis), opera danda, ut laborans decumbat in conclavi nec calido nimis, nec etiam valde frigido. Is enim fluxum sanguineum auget: hoc vero præcociter illum sistit. Prospiciendum illi de cibo refrigerante, adstringente & incrassante: propinandi potus itidem refrigerandi constringendique facultate præditi: à salsis, aromatizatis, acrisque ferculis abstinendum: vinum meracum vitandum: ὀλιγοπόρον, siquidem sit adultior, debilior, & vino assuetus, concedendum: aut hujus loco decocta, emulsiones & julepi parandi: animo & corpore quiescendum: in dorsum reclinato capite versus posteriora minimè decumbendum, multoque minus hac situatione corporis somnus capiendus. Metus enim est, ne sanguis retrocedat, & partim in gulam, partim verò in asperam arteriam & fistulas pulmonum defluat, hominemque suffocando è medio tollat.*

LXXXVIII. *Cibi convenientes sunt isti, brodia alterata, pulmenta ex amylo, hordeo, oryza, milio &c. confecta: gelatinae, carnes gallinarum, caporum, agnorum, hædorum, vitulorum, & ver-*

¶ *vervecum, aceto, succo limonum, citriorum, auranciorum, granatorum acidorum, agresta condita: poma, pyra, pruna, cydonia & cerasia cocta: pisces saxatiles: denique & olera, utpote spinachia, beta, lactuca, endivia, portulaca, acetosa &c. Avicenna scribit, cerebella gallinarum, multum & saepe comesta, singularem esse & cibum, & medicinam in sanguinis fluore.*

LXXXIX. *Potus sit vinum, quale thesi 87. descriptum: aut rubellum, sed dilutum aqua. Emulsio amygdalar. dulc. & 4. sem, frig. major: cum decocto hordei, passular. flor. cordialium, glycyrrhiz. & sem. coriandri preparat. Decoctum ipsum per se, sine amygdalis, sumptum. Julepi ex aquis supra enumeratis & syrupis acidulis confecti: quales præ ceteris sunt syr. acetos. citri, auranciorum, limonum, granator. acidor. acetosa, acetosella, ribium, berberum. &c. Aqua chalybeata, itemque cum mastiche, aut ligno lentiscino cocta. Decoctum rad. tormentilla, in quo conserva rosar. rubrar. antiqua dissoluta, postea colatum.*



COROLLARIA.

I.

QUæ hæmorrhagia frequentior, eâne, quæ ex venis, an quæ ex arteriis contingit? *Rarior esse solet arteriarum. Etsi enim sanguis arteriosus calidior sit, spirituosior & subtilior venoso, tamen cum arteria ob crassitiem, duritiem, & firmitatem substantiæ suæ, non tam facile aperiantur, rumpantur, erodantur, & vulnerentur, ac venæ, quarum tunica est tenuis, simplex, & mollis, idcirco fluxus arteriosi sanguinis spontaneus minùs frequens est, quàm venosi. Vid. de hac ratione Galenum in genere loquentem lib. 3. de sympt. caus. cap. 2. Secus se res habet, si membra interiora & exteriora à causa aliqua externa rumpantur,*

cur, diffecentur, perforentur, contendantur, aut erodantur. Tunc enim uterque sanguis effluit, quia uno eodemque tempore vasa venosi & arteriosi sanguinis continui solutionem patiuntur.

II.

Cur sanguis arteriosus ægrius sistatur, quàm venosus? Cause sunt due. Vna ex parte contenti sanguinis: altera ex parte continentis vasis. Nam sanguis arteriosus tenuis est, fervidus, spirituosus, exilitq; veluti cum saltu, ac ob id agrè compescitur. Venosus contrario modo se habet, ac ob id sistitur facilius. Arteria, cum sint in perpetuo motu diastoles & systoles, sitque tunica earum sicca & dura, propterea neque facilè clauduntur, neque promptè consolidantur. Citiùs contra venæ, quæ quiescunt, & minùs sicca sunt ac dura.

III.

Possitne sanguis naturali ex causa effluere per spiracula cutis, ut quasi sudor appareat sanguineus? Potest: idque testatum fecit experientia, & rationes quoque sunt in promptu. Nam sudorem quendam ferosum sanguineum, per poros cutis undiquaque erumpentem in Studioso quodam vidit Guil. Rondeletius l. de dignosc. morb. c. 11. Fernelius scribit l. 6. method. cap. 4. se sanguinem ab extremis venis, quæ in cutem desinunt, multis è locis effusum observasse. Aristoteles l. 3. part. an. c. 5. & l. 3. hist. an. c. 19. refert, aliquos interdum sanguineum sudasse sudorem. Idem referunt Theophrastus l. de sudorib. ex sententia Monæ Medici, & Galenus l. de util. respir. qui tamen inter rà vòba illius refertur. Rationes hujus excretionis dari possunt tres. I. est sanguinis tenuitas & aquositas, à debili calore genitus. II. Raritas & laxitas cutis, pororumq; ejus aperio. III. Facultatis retentricis venarum & hepatis infirmitas.

IV.

Cur utplurimum sanguis, qui exit per nares, subtilior sit puriorque eo, qui effluit per alia loca, ut per uterum, per venas sedis, per meatus urinæ &c. Quia qui à vâ repit, levior

levior esse tenetur, & consequenter etiam subtilior ac purior. Qui κᾶτω fertur, gravior est, & propterea crassior, impuriorque: qualis est melancholicus & phlegmaticus.

V.

Quam ob causam homini solummodò ex omni animalium numero sanguis è naribus fluat? Causam dat Aristoteles problem. 2. sect. 10. eamque esse dicit magnitudinem & humiditatem cerebri humani. Tale enim plurimum excrementi serosi & aquei producit, quod postea sanguini in venis permiscetur, eumque vitiat & tenuiorem reddit. Hinc venæ distantia ἀναστόμωσι patiuntur. Osculis autem earum adaperitis, sanguis effluit. Brutis cerebrum longè minus est, minusque humidum: nec ita facile vapores ascendentcs excipit, ut humanum, cum homo erectus incedat, bruta autem prona terram spectent.

VI.

Num sanguinis è naribus profluvium pro symptomate in genere excretorum, an pro opere Naturæ habendum? Symptoma est, si in principio statim affectus, aut ob retentricis infirmitatem sit obortum, nullo cum patientis levamine. Opus autem Naturæ est, tum in sanis, tum in agris, si fiat ἐκ καρπῶ, ut Galenus in fine l. de diff. symptom. loquitur, h. e. tempestivè. Ἐκ καρπῶ autem fieri excretiones ab eodem ibidem dicuntur, si τὰ λυπεύοντα, ea, quæ molesta sunt, excernantur: sique vacuatio facile toleretur, & homo à molestia, qua premebatur, liberetur, vel saltem haud mediocriter levetur. Ejusmodi actiones idem Galenus eodem in loco singulari Naturæ providentia fieri dicit, & indicia esse scribit ejusdem roboris ac virtutis, à redundantia, qua veluti sarcina, premebatur, sese exonerare studentis.

VII.

Nunquid hæmorrhagia mortem homini inferre queat? Omnino, si sit immodica, & sisti nequeat. Causæ fuerunt allatæ abesi 2. Et Aristoteles subscribit l. 5. hist. an. c. 19. Si, inquit, multum

multum sanguinis effluat, anima deficit, h. e. leipothymia & syncope oboritur. Si nimium, vita interit. Perisse autem quosdam ex hemorrhagia narium enormi, historicorum monumenta docent. Hoc enim affectionis genere Adrianum Imperatorem, Attilam Hunnorum Regem, & Alexandrum, Basilij Macedonis filium, extinctum esse memorant. Offerunt se quoque exempla nostro tempore non pauca.

VIII.

Quæ sint excretionis præter naturam differentia? Galenus l. de syptom. differ. c. ultimo tres recenset. Nam quæ excernuntur, vel peccant substantia, vel qualitate, vel quantitate. Nos addere possumus quartam, quando excretio fit per loca insolita & naturæ inusitata. Excretio substantiæ ratione præter naturam dicitur dupliciter. I. quando corpora peregrina, animata & animæ expertia, quorum plurimas species Schenckius l. 3. observat. 73. & seqq. collegit, evacuantur. II. cum res quæpiam, quæ ipsa quidem naturalis est, sed quæ retineri potius, quàm excerni debebat, exit: quo in numero sanguis est, si intempestivè expellatur. Excretio ratione loci præter naturam dicitur, cum v. g. alvi feces per os, urina per umbilicum, aut perinaeum, menstruum per nares, os, mammas, aures, oculos &c. egreditur. Excretio ratione qualitatis præter naturam perhibetur, si excreta vel in primis, vel in secundis qualitatibus à naturali statu recesserunt. Excretio ratione quantitatis præter naturam judicatur, cum contenta vel immodicè effluunt, vel parcius prodeunt, vel rariùs, quàm deceat, evacuantur.

F I N I S.